

**Attaveqarnermut Silaannaap Pissusaanut Avatangiisinullu Naalakkersuisoq**  
Landsstyremedlem for Infrastruktur, Klima og Miljø

28.01.2008  
J.nr. 34.20

Postboks 909  
3900 Nuuk  
Oq/tel +299 34 54 00  
Fax +299 34 54 10  
iap@gh.gl  
www.nanoq.gl/iap

Hr. Inatsisartunut ilaasortaq Esmar Bergstrøm  
/maani

## **VHF DSC-p Kalaallit Nunaannut eqqunneqarnissaanik Naalakkersuisut pilersaaruteqarnersut pillugu § 36 naapertorlugu apeqqummut akissut**

Asasara Esmar Bergstrøm,

VHF DSC-p Kalaallit Nunaannut eqqunneqarnissaanik Naalakkersuisut pilersaaruteqarnersut pillugu apeqqutinnut qujanarsuaq.

Ilisimatitsissutigisinnaavara, Naalakkersuisut maannarpiaq HF DSC-p Kalaallit Nunaannut eqqunneqarnissaanik pilersaaruteqanngimmata.

Periarfissaq manna iluatsillugu akissut taanna itisilissavara nassuiarluassallugulu. Naalakkersuisoqarfimmiit imaani isumannaassutsimik radioqarnermillu nakkutilliinermi, innuttaasut isumannaassusaannik salliutitsiviusumi teknologiip nutaap periarfissarititai ingerlaavartumik misissorneqartarput. Naalakkersuisut naliliinerat malillugu VHF DSC-p Kalaallit Nunaanni atuutsinneqalernissaanut ajornartorsiutit, atuutsitsilinnginnermi paasiinaaffigineqartariaqartut arlaqarput.

VHF DSC isumalimmik piorsarneqassappat, tamatumunnga atatillugu suliassat marluk misissuiffigineqartussaassapput.

1. Sinerissami radioqarfinnik nassitsisarfinnillu, VHF DSC-p maligaasaanik nassitsisinnaasunngorlugit tigooqqaasinnaasunngorlugillu piorsaaneq.
2. Innuttaasut suliffeqarfiillu VHF-radioinik DSC-linnik atuisinnaanngorlugit piorsaaneq.

### **Sinerissami radioqarfinnik piorsaanissaq pillugu**

Sinerissami radioqarfiit DSC-kkut nalunaarutinik tigusinnaassappata suliaqarsinnaassappatalu, aammalu annassiniarnermi oqartussaasunut attuumassutilinnut ingerlatsisinnaassappata piorsaanissaq pisariaqarpoq.

Sinerissami radioqarfiit ajunaalersunut sillimaniarnermilu sullissisarnerat danskit naalagaaffiannit akisussaaffigineqarpoq aningaasalersorneqarlunilu. Kalaallit Nunaata sine-riaani radioqarfiit imarsionermi ajunaalersunik sillimaniarnermilu sullissinerannut pissaaffiit, taakkulu aningaasalersorneqarnerisa naalagaaffimmi oqartussaasunit tigummiinarneqarnerat tamatumunnga pissutaavoq, aammalu nalunaarasuartaatitigut attaveqaqatigiinnermi pissutsit ilaat pillugit inatsit nr. 743, 4.11.1990-imeersoq, kingusinnerusukkullu nalunaarasuartaateqarnermi pilersuisussaataaneq pillugu inatsisip allanngortinneqarneranut inatsit nr. 1090, 29.12.1997-imeersoq naapertorlugu pilersuisussaataitaasumut, tas-

salu Tele Danmark-imut (ullumikkut TDC)<sup>1</sup> suliakkiunneqarluni. Pisussaaffik taanna 31. december 2007-imi naavoq, kisiannili "Nalunaarasuartaateqarnermi pilersuisussaaitaannermik suliaqartussatut toqqarneqarsimasup sullissinerata sivitsorneqarnissaa pillugu nalunaarut" pillugu nalunaarummi nr. 1411-mi 31. december 2008-ip tungaanut sivitsorneqarluni.

Tamatuma kingunerisaanik annertusaanermut ingerlatsinermullu aningaasartuutit danskit naalagaaffiata isumagisussaavai. Tamatumungattaq naalagaaffiup atortunik, nunat tamat akornanni pisussaaffiit aalajangersakkallu Danmarkip akuerisimasai, siunissamilu suliaqartimmut tunngatillugu akuerisagassai naapertorlugit sullissinernut pisariaqartinneqartunik piorsaanissamut aningaasalersuinissamut pisussaaffeqarnera ilaavoq.

Sullissinerit neqeroorutigineqartussat annertussusissaat pilersuisussaaitaanerup nasuiarneqarnerani ilaatinneqarput. Nunat tamat akornanni isumaqatigiissutigeriikkatta saniatigut neqerooruteqartoqassasoq Naalakkersuisuniit aalajangissagutta, aningaasalersuinissaq Namminersorerullutik Oqartussat kisimiillutik isumagisussaassavaat. Kalaallit Nunaata sineriaani radioqarfiit piorsarneqassappata, tamatuma 5,2 millioner koruuninik akeqarnissaa TELE Greenlandip 2001-imi missiliorpaa, kiisalu ingerlatsinermut ukiumut aningaasartuutissat 5,5 millioner koruuniunissaat missiliorlugu. Naalakkersuisut isumaat malillugu Namminersorerullutik Oqartussat aningaasartuutissaat piorsaanissamut aningaasartuutissanut ilanngullugit innuttaasunit akilerneqartussat, pissarsiassanut naleq-qiullugu naapertuutinngillat.

### **VHF-radionik pioreersunik piorsaanissaq pillugu**

Innuttaasut DSC-kkut nalunaarutininik umiarsuarmit ataasimiit allamut, taamatullu sinerisami radioqarfimmut nassitsisinnaassappata tigooqqaasinnaassappatalu VHF-radiot DSC-qanngitsut nutaanik DSC-talinnik taarsersorneqartariaqassapput.

Ilisimatitsissutigisinnaavara, radioqarnermik ingerlatsiviup 2008-p aallartinnerani umiarsuit 2015-it VHF-illit nalunaarsorsimammagit, taakkunanngaanniillu 330-t VHF DSC-qartutut nalunaarsorneqarsimallutik. Tassalu maannarpiaq umiarsuit 1700-ngajaat radionik pisariaqartinneqartunik soqanngillat, taamaattumillu VHF DSC-t tamakkiisumik atorsinnaanagit. Umiarsuit taakku nutaanik radiolersuinissamut, immaqalu aamma GPS-ikkut tigooqqaassutinik pisinissamut peqquneqassappata, innuttaasut amerlasuut 6.000-it aamma 8.000 koruunit akornanni aningaasartuuteqartariaqassapput.

Kanal 16-ikkut tusarnaarut peerneqarsinnaassappat Kalaallit Nunaata imartaa IMO-mi A1-itut<sup>2</sup> nalunaarsorneqarnissaa pisariaqartussaavoq. Tamatuma kingunerisaanik nuna tamakkerlugu VHF-imik atuiffiusinnaalertussaassaaq, tamannalu Naalakkersuisut isumaat

---

<sup>1</sup> " Kalaallit Nunaanni imaatigut ajunaalersunik sillimaniarnermilu radiot aqqutigalugit sullissinerit, Nassuiaat killiffimmullu nalunaarsuaq, 2003-mi decembari", Danmarkimi Kalaallillu Nunaanni nalunaarasuartaateqarnikkut pissutsit pillugit siunnersuisoqatigiinneersoq.

<sup>2</sup> Ullumikkut Kalaallit Nunaata imartaa sumiiffik A2-tut nalunaarsugaavoq, taamaattumillu MF DSC-mik atuiffiuvoq, taamaattumillu umiarsuit MF-imut atortoqarnissamut pisussaatinneqartut aamma DSC-mik peqartussaapput.

malillugu ajornarpoq. Taamaattumik apeqquteqartup VHF DSC-mik atuutsitsilernissamut tunngavilersuutigisaatut tusarnaarutikkut sipaaruteqartoqarsinnaanissaa naatsorsuutigineqarsinnaangilaq.

Tamanna tunngavigalugu Naalackersuisut maannarpiaq VHF DSC-mut piorsaasoqarnissaa naapertuussorinngilaat. VHF DSC-mik atuilernissap piumasaqaataalernissaa nunat tamat akornanni isumaqatigiissutigineqassappat, soorunami Danmarkip imarsiornermi ajunaalersunik sillimaniarnermilu sullississutinut aningaasaliinissamik pisussaaffini naammassissagaa, aammalu erngerluni piorsaanermik aallartitsissasoq Naalackersuisuniit naatsorsuutigineqarpoq. Tamannalu pissappat DSC-qanngitsunik VHF radiollit radiotik nammineq akilikkaminnik taarsertariaqalissavaat. Naalackersuisoqarfimmiit Imarsiornermut Ataatsimiititaliatulli aamma TELE Greenlanditulli inassutigineqarpoq, innuttaasut VHF-radionik nutaanik pisiniartut DSC-talimmik piseqqullugit, sinerissami radioqarfiit piorsarneqartussaangikkaluarpataluunniit taakku amerlanerusunik periarfissaqarmata. Tamatumunnga peqatigitillugu erseqqissaatigineqassaaq, angalasut tamarmik isumannaasusaat pitsaanerpaatinniarlugu angallatit radiollit tamarmik kanal 16 tussarnaartussaammassuk.

Ikinngutinnersumik inuulluaqqusillunga

Kim Kielsen